

БУРЕ ВАЁН

Лэчыт визь кыльыліз вужере

А. Ермолаев критиклы - 85 ар

Анастасия ШУМИЛОВА


Критикатэк литература өвөл - тае валало писательёс но, литературоведёс но, лыдзисёс но, но со дыре ик критиклэн ужез ёмысь вужере кыле. Сое валано А. Ермолаевлэн улэм-вылэмезья но.

Нимьёсты усьтись

Тросэзлэн дано удмурт писательёслэн, поэтёслэн талантсы юнмаз, ужъёсы лыдзись доры вуизы Алексей Ермолаев критиклы, текстологы, литературоведлы луыса. А. Ермолаев юрттиз Ф. Васильевлы, Г. Красильниковлы, Р. Валишинлы, В. Романовлы гожъяськон сюрессэс мытыны. Репрессиос улэ шедем писательёсты - К. Гердэз, А. Окиез, К. Митреез - лыдзисьлы берыктиз. Удмурт литературалэсь азинскемзэ, историзэ, аспёртэмлыко сюрессэ возматиз А. Ермолаевлэн лэчыт пероюз. Со гожъяськыш литератураен тодматкисьёс, сое эскерисьёс, соин вырисьёс, пичиос но быдэ вуэмъёс понна.

Алексей Афанасьевич Ермолаев вордскиз 1934-тй арын 5-тй толшоре Татарстанысь Кукмор ёросысь Киня гуртын. Тодон-валан басьтиз Можга педучилищын, МГУ-ысь журналистика факультетын. Ужас Удмуртиысь издательствоын, УдНИИ-ын, «Молот» журналын, борысь литератураен гинэ выриз.

Критик улонысь кошкыз 2006-тй арын, туэ солы 85 арес тырмысал. А. Ермолаевлэн юбилеез-



А. Ермолаев.

лы сйзыса, Удмуртиысь Национальной библиотеказын 12-тй южтолэзе ортчиз «Удмурт литературалэн ингожысьтыз» электронной изданилэн презентациез. А. Ермолаевлэн ужъёсыз 3 томе люкамын. 1-тйез том сйезмын удмурт литератураез кылдытисьёслы, 2-тйез книгаын усьтэмын критиклэн удмурт литература удысысь азинсконъёс шоры учконэз, 3-тй томын Алексей Афанасьевичлэн зуч кылын ужъёсыз люкамын. Изданиез люказ но дасяз А. Ермолаевлэн кузпалыз Нина Георгиевна Ермолаева - Россиясь Журналистёслэн но Писательёслэн огазеяськонъёсылэн члензы. Жалыса верано, коньдон өвөлэн книгаез өз печатлалэ - со интыямын Национальной библиотеказын электронной «жажыосаз».

Пумиськоньын А. Ермолаевез буре вайизы критик но журналист Александр Шкляев, писатель но ли-

тературовед Василий Ванюшев но Нина Ермолаева.

Зэмлыкез утись

Александр Шкляев верамъя, А. Ермолаев удмурт литератураын нырысетйез бадзым критик луэ. Критикез ёмысь уг валало, премиосын уг эркияло, уг зарнияло вал - А. Ермолаев, тае валаса, вань шугсекутёсты чидаз, соосын кыдаз. А. Ермолаевлэн одйг кылыз но мултэс өвөл, ужъёсыз мур пуштросоесь, критический жанресты со быгатыса уже кутыліз. Со быдэс удмурт литератураез синйылтыса уліз, шуиз Александр Григорьевич. А. Ермолаев Флор Васильевлэсь кылбурёссэ одйг книгаез люкаса поттиз. Котыкуд кылбурлэсь ку гожтэмзэ, кытын печатламзэ пусйыса кельтиз, вераз А. Шкляев. Со быдзым уж, но калык сое ёмысь уг адзы, уг дунъя.

Василий Ванюшев А. Ермолаевен, Можга педучилищын дышетскыкузы, тодматкем. Соос Екатерина Коновалова лэн литературной кружоказ ветлйллэм. А. Ермолаев ачиз гожъяськымтэ, но мукетъёсызлэсь ужъёссэс сарттыкупертчыкузы, котыку туж шонер чакланъёссэ шарая, зеч дэмланъёс сётъя вал, пе. Е. Коновалова одйг пол шуэм А. Ермолаевлы: тон критик луод. Можга педучилищез йыпшумъямез бере А. Ермолаевез Москвае дышетскыны келяллям. Удмуртие бертылыккуз, со педучилищезе пыралля вал, пе, эшгёсызлы вера дышетскемез сярысь.

Эшезлэн сюрестиз мынэм Василий Ванюшев но

- Москваысь кун университетэ дышетскыны пырем. Василий Михайлович тодэ вайытиз А. Ермолаевлы сйзем «Незамеченный подвиг исследователя» статьязэ. Алексей Афанасьевич Ф. Васильевлэсь кылбуретсэ «сйсыяса-поръяса сётэм», 2004-тй арын аслаз коньдонэныз печатлам Ф. Васильевлэн кылбурёсызлэн изданиосызлы удмурт оригинальёсызъя радъям указатель. Солы луыса кылбурёсызлэсь мукет кылъёсы берыктэмъёссэ туж капчи шедьтыны. Туж жаль, та книга 100 экземплярэн гинэ потэмын - со котыкуд библиотекаын луыны кулэ, асьмелы одно тыршоно А. Ермолаевлэсь ужзэ вольмытыны, шуиз В. Ванюшев.

Педучилищын дышетскыкузы - В. Ванюшев 1-тй курсынын вылэм, А. Ермолаев - 3-тй курсынын - В. Ванюшев огпол мукет студентъёсын волейболэн шудэ вылэм. «Пичи» первокурсникез бадзым курсёсын дышеткисьёс палэнтйллэм. А. Ермолаевлэн вожез потэм, со В. Ванюшевез шудонэ берыктэм но шуэм: сыл, нокытчы эн кошкы. Соку В. Ванюшев нырысьсэ адзем А. Ермолаевлэсь зэмлыкез утыны выремзэ.

Со сямзэ шунытэн тодаз вайиз Нина Ермолаева но. А. Ермолаевен соос, МГУ-ын 3-тй курсынын дышетскыкузы, тодматскиллям.

Одйг пала учкыса...

- Антуан де Сент-Экзюпери «Планета людей» книгаяз гожтиз: яратись адымиос ог-огзы шоры уг учко, соос огпала учко, - вера Н. Ермолаева. - Озы ми ог

50 ар ёже одйг сюрестиз вальмышъям ёшен, одйг пала учкыса, одйг ужез лэсьтыса. Алексей Афанасьевич туж оскымон мурт вал - яратоньын, эшгёсыконьын, котыку кылзэ кутиз ужез но удмурт кылыкез понна. Студент дыръяз ик со удмуртёс понна тыршыны кутскиз, ваньмон дырзэ Ленин нимо библиотекалэн архивёсаз ортчытяз, репрессиос улэ шедем писательёслэсь гожъямъёссэс утчаз, эскериз.

Алексей Афанасьевич коньдон потгон сярысь ноку өз сюлмакылы, ачиз понна өз вырылы. Игнатий Гаврилов кулэм бере А. Ермолаев солэсь «Гвардеецёс» повестезлэсь черновикёссэ, фронтысь дневникёссэ шедьтиз, радъяса книгаосын поттиз. Мон юасько: кыче гонорар со понна басьтод? Со шуэ, мон, пе, уг быгатиськы со гонорарез асылым кельтыны, мынамо сое Клавдия Кузьминичалы - И. Гавриловлэн кышноезлы - сётэме потэ. Монэн кенешемез бере озы ик кариз. Пётр Чернов, Геннадий Красильников но мукетъёсыз солы вазиськылызы, кенеш курыса. Со ваньмызлы юрттыны дась вал, со понна номыр өз курылы, өз возмалля. Алексей Афанасьевич котыку озы улйз - удмурт калыкеныз огкылыс.

Пумиськонлэн пумаз кунослы возматизы Нина Георгиевна лэн архивысьтыз Алексей Афанасьевичен видеокадрёсты. Со вакчи видеоосты учкыса гинэ но, синмаськоно критиклэн лэчыт визезлы, шуныт юморен пачылам вераськемезлы. ***

Зеч атай но кылбурчи

Екатерина ЛЮБИЧ

5-тй южтолэзе Национальной библиотеказын буре вайизы Иосиф Ивановез - Ф. Васильев нимо литературной премиен пусьем кылбурчиез, Россиясь Писательёслэн огазеяськонзылэсь ёзчизэ.

Иосиф Зотович вордскиз 1953-тй арын Алнаш ёросысь Улын Котныр гуртын. 1974-тй арысен со ужас «Алнашский колхозник» газетын нырысь корреспондент, собере редактор луыса. Озы со кема аръёс ёже вордскем палтёсыз но калыкез сярысь гожъяз. Та газетын ик нырысьсэ печатламын вал солэн кылбурёсыз. Соку Иосиф Ивановлы 16 арес вал.



И. Ивановлэн нуныкаосыз Валерия но Лира.

Борысь солэн чуръёсыз удмурт но зуч кылъёсын поталлязы Удмуртиысь портэм изданиосын, нылпиослы «Мурзилка», «Костёр», «Колобок»

журналёсын. Кылбурёсыз пор, чуваш, коми, калмык но мукет кылъёсы берыктэмын,

пыртэмын удмурт «Букваре» но семьяен ёш лыдзыны чаклам книгаосы.

Пумиськоньын Александр Шкляев критик Иосиф Ивановез «нылпиослы гожъясь удмурт писательёс пöльысь берпуметйез классик» нимаз.

Иосиф Зотовичлэн журналистын но редакторын ужомез сярысь мадиз УдГУ-ысь Удмурт кылобуръя, финно-угроведения но журналистика институтысь профессор Александр Вахрушев. Нылпиослы гожъяськысь кылбурчи сярысь вераськы И. Ивановлэн эшез - Удмуртиысь калык писатель Вячеслав Ар-Серги.

Иосиф Зотовичлэн нылыз Ангелина Сидорова - Удмурт кылобуръя, финно-угроведения но журналистика

институтлэн директорезлэн воштйез - вераз, кытысь атаез сюжетёс басьяз. Атаез пиналгёссэ туж яратэ вылэм, соос ик бурдъяллям сое гожъяськыны. Иосиф Зотович школае собраниосы ачиз ветлылэм, нылпиосызлэсь дорысь ужзэс эскерылэм. Пиналгёсыныз ёш со суредаскыны яратэ вылэм. Нылпиосызлэн вормонгёссылы со туж шумпотэ вал, пе. Соин кылбурёсыз небыт юморен тырмемын.

Кылбурчилэн нунокъёсыз но студентгёс Иосиф Ивановлэсь кылбурёссэ удмурт но зуч кылъёсын лыдзизы. Кылбурчилэн чуръёсызъя гожтэм выль кырзанзэ быдэстиз Дәри ёросысь Якшур гуртысь Николай Мерзляков бард.***